

石屋、普愚三书

记七月间，长老不憚万里崎岖，求决己事，来余峰顶。此时相见，老僧无一法可说，长老无一字可闻。是真相见。若有毫端许言之本末，皆为见刺。此是从上古人相见的道理。长老当自保养，转示将来，免堕邪见。腊月十七日，海门洪长老来山，喜闻长老已回大都。不审归乡去留如何？便中略此记达，万万以大法为重。是祷！是祷！

至正丁亥腊月廿九日

湖州霞雾山居石屋 老衲清珙 手启太石愚长老

上石屋和尚书

弟子高丽国重兴禅寺普愚，九拜谨启本师霞雾山石屋大和尚座下：

自八月一日为辞，无日不瞻企。善路行行，十月十五日，回大都。曩锥稍露，诸山硕德、朝廷大臣奏闻，圣旨住持永宁禅寺。十一月廿四日太子千秋令辰，赐金襴、拂子、茗香，天使令严诸方四众，仅百千万人，击鼓围绕，不得已升座，首〔〕祝厘之香。次为老和尚，拈出怀香一瓣，开演宗乘，扶扬末法，此岂法乳之大恩也哉！不敢不告。家丑一场，狼藉卑辞。谨以写呈。某愿明春再参，终身服勤。傥业缘所拘，不果归乡，一依所教，随分二利，不贱卖佛法，以至后来，不断种子。然此岂独吾之所能，正是佛佛祖祖本愿提持也。向者遇谒和尚，所以嗣承大事。此日奉诏开堂，亦有其使，然岂敢以拙言，了陈鄙怀！伏惟照详重复，再拜祝愿本师大和尚，起居万福万福。乡人有便，慈悲垂问，以慰区区。

石屋和尚答书

启复。别后，老病日增，掩关自养，苟遣朝夕。戊子十月十三日忽净慈专人，递至长老书。诵间，且知太古时缘俱稔，诸山宿德、大臣宰官奏闻，圣旨住持永宁禅苑，开堂演法，光扬宗教。此乃长老情真契圣，行实感人，岂偶然哉！又知开堂日，瓣香为老拙拈出，且拙者退席从闲，少歇狂妄耳，焉敢妄想为人之师！今长老乃如是，岂非多生缘契也？！然而出世为人，要以本分事，激引来蒙，慎勿以机境上递相狐媚，大家草里辊，斯何图哉？当自勉旃，果能如此，始终不异，则皇恩、佛恩一时报毕。吾复何言？路途虽千万里之遥，由目击耳。老倦具答不谨。可恕！可恕！

至正八年十一月初七日

霞峰石屋 启复

(注：元至正八年为公元 1348 年)